

**■ TRIBUNA POLITICA**

# Grazia a tut las forzas che prestan lur servetsch a favur da la publicitad

DA CHRISTIAN RATHGEB\*  
CUSSEGLIER GUVERNATIV

Il 1. da schaner 2016 è entrada en vigur la revisiun totala da la nova lescha davart la protecziun da la populaziun. Questa lescha regla tranter auter da nov la direenziun en situaziuns extraordinarias. Deplorablaimain n'hai betg durà ditg fin che la nova lescha ha stuì sa cumprovar. Dapi la revisiun totala avain nus en il chantun Grischun stuì dumagnar l'acziun da stizzar la pli gronda en Svizra dapi 20 onns en la Mesolcina, las malauras en l'Engiadina Bassa sco er la bova la pli gronda en las Alps dapi 100 onns a Bondo. Medemamain avain nus stuì vegnir a frida cun blers grevs accidents da fitg gronda sfida durant ils ultims onns: l'accident da viafier en la Val d'Alvra, la crudada d'aviums en Engiadina e sin il Segnas, l'incendi d'in car en il tunnel dal San Bernardin ed ils accidents da traffic che na dastgan betg vegnir ignorads.

Las acziuns d'agid correspundentas prestan la polizia chantunala, ils pumpiers, ils servetschs da salvament, ils ospitals, la protecziun civila, ils manaschis tecnicos sco er auters posts chantunals ed autras organisaziuns partenarias. Las acziuns vegnan organi-



sadas e manadas bain ed han ina buna basa en minga regard. Las persunas professunalas e da milissa bain scoladas èn adina qua per nus ed èn prontas da tuttas uras da prender sin sai incumbensas umanas fitg difficilas. Ellas na san mai cura ch'ellas ston intervegnir. Ordavant na san ellas er betg en detagl tge ch'ellas vegnan a scuntrar al lieu. Al lieu da l'eveniment sco tal lavuran differents teams che sa cumponan da las differentas organisaziuns partenarias sco la polizia, ils pumpiers, la Rega, il salvament alpin, la Redog, il First Responers u il Care team. Quai pretenda ina gronda cumpetenzza professunala ed in'auta flexibilitad. Ins na dastga betg emblidar ch'i sa tracta qua en divers cas d'organisaziuns da milissa, da las qualas ins spetga ina lavur zunt professunala e las qualas prestan ina part considerabla da questa lavur durant lur

temp liber. Per mantegnair l'aut nivel da professionalisaziun exerciteschan las differentas organisaziuns partenarias per l'ina independentamain entaifer l'atgna organisaziun, per l'autra però er regularmain en cuminanza, e quai a chaschun da scolaziuns e da trenaments, dentant er a chaschun d'exercizis.

Tut questas acziuns vegnan purtadas dad umans che sa chattan il pli davant e che guardan en fatscha a las persunas blesadas, disgraziadas, pertutgadas e deplorablaimain savens er mortas sco er a lur confamigliaras e confamigliars. Las acziuns ed incumbensas fitg pretensiusas pudain nus mo dumagnar perquai che nus avain dunnas ed umens en questas organisaziuns, dals quals nus pudain ans fidar en tuts cas. Savens vegnan els confruntads cun situaziuns fitg grevas e tragicas. Tut questas persunas furneschan prestaziuns a favur da la generalitad e cumprovan uschia in grond senn da responsabladad. Els dattan segirezza a la populaziun ed als giasts da noss bel chantun turistic. Perquai meritentan els tuts gronda reconfianza e stima ed in zunt cordial grazia fitg.

\* Cussegliaer guvernativ Christian Rathgeb è schef dal departament da giustizia, segirezza e sanadad.